



Ձ Ե Կ Ո Ւ Յ Ց

ԹԵՄԱ _____ *Դաստիարակության մեթոդների կիրառումը տարրական դասարաններում*
ՀԵՂԻՆԱԿ _____ *Արուս Դոլունց*

Քննարկվել, հավանության է արժանացել

մեթոդախմբի անուն _____ նիստում: Արձանագրություն թիվ _____

Մեթոդախմբի անուն _____
(ստորագրություն)

Ռիտա Շալունց
(ազգանուն, անուն)

Ուսումնական աշխատանքների գծով տնօրենի տեղակալ _____ *Սերգեյ Ավանեսյան*
(ստորագրություն) (ազգանուն, անուն)

ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ

ԳԼՈՒԽ 1 ԴԱՍՏԻԱԴԱԿՈՒԹՅԱՆ ՄԵԹՈԴՆԵՐԻ ԸՆԴՀԱՆՈՒՐ ԲՆՈՒԹԱԳԻՐԸ ԵՎ ԿԻՐԱՌՈՒՄԸ ՏԱՐՐԱԿԱՆ ԴԱՍԱՐԱՆՆԵՐՈՒՄ

- 1.1 Դաստիարակության գործընթացի էությունը, խնդիրները, սկզբունքները տարրական դասարաններում
- 1.2 Անձի գիտակցության ձևավորման մեթոդները տարրական դասարաններում
- 1.3 Անձի գործունեության կազմակերպման և հասարակական վարքի փորձի ձևավորման մեթոդները տարրական դասարաններում
- 1.4 Վարքի և գործունեության խթանման մեթոդները տարրական դասարաններում

ԵԶՐԱԿԱՑՈՒԹՅՈՒՆ

ՕԳՏԱԳՈՐԾԱԾ ԳՐԱԿԱՆՈՒԹՅԱՆ ՑԱՆԿ

ՆԵՐԱԾՈՒԹՅՈՒՆ

Դաստիարակության բովանդակությունն ու խնդիրները պայմանավորված են հասարակության պահանջմունքներով և անմիջականորեն առնչվում են պրակտիկային: Դաստիարակության գործընթացն ունի բավականին բարդ կառուցվածք: Այն ենթադրում է դաստիարակության նպատակի առկայություն, առաջադրված նպատակին հասնելու համար համապատասխան խնդիրների առաջադրում և լուծում, դաստիարակության բովանդակություն, նրա որևէ բաղադրամասի ուղղությամբ իրականացվող դաստիարակության մեթոդների, հնարների, միջոցների ճիշտ ընտրություն, ինչպես նաև ակնկալվող արդյունքներ, դաստիարակչական գործընթացի արդյունավետության վրա ազդող գործոններ և այլն:

Արդի դաստիարակության գործընթացում մանկավարժն իրականացնում է մի շարք դերեր՝ դասավանդող, աջակցող, ուղղորդող, երեխայի իրավունքների պաշտպան, ավագ ընկեր, խորհրդատու և այլն: Բազմագործ դերերն ուսուցչին օգնում է ծագած խնդիրներում արագ կողմնորոշվել, համագործակցության շնորհիվ երեխայի սեփական «Ես»-ը ձևավորելու, որոշակի հասարակության մեջ նրա պատկանելիությունը հստակեցնելու հարցերում:

Հետազոտական աշխատանքի թեման արդիական է, քանի որ դաստիարակության գործընթացը, մշտապես ենթարկվելով հասարակական կյանքի մարտահրավերներից բխող փոփոխություններին, պահանջում է նորովի մոտեցումներ, շարունակական կատարելագործում կազմակերպման, իրականացման եղանակների՝ մեթոդների: Ուստի դաստիարակության մեթոդների կիրառման առանձնահատկությունների բացահայտումը տարրական դասարաններում ժամանակի հրամայական է:

Հետազոտական աշխատանքի նպատակն է վերլուծել դաստիարակության մեթոդները, բացահայտել դրանց կիրառման առանձնահատկությունները տարրական դասարաններում:

Հետազոտական աշխատանքի խնդիրներն են՝

- Ուսումնասիրել դաստիարակության գործընթացի էությունը, խնդիրները, սկզբունքները տարրական դասարաններում,
- Ներկայացնել դաստիարակության մեթոդների դասակարգը,
- Վերլուծել դաստիարակության անձնակողմնորոշված տեխնոլոգիաների կիրառությունները տարրական դպրոցում:

Ժամանակակից տարրական դպրոցի առջև դրված են դաստիարակությանը համընդհանուր, նպատակային բնույթ տալու և դպրոցականի բազմակողմանի և ամբողջական դաստիարակությունն ապահովելու խնդիրներ, որոնց լուծման համար պահանջվում է դաստիարակության տեխնոլոգիաների և մեթոդների արդյունավետ նախագծում և կիրառում:

**ԴԱՍՏԻԱՐԱԿՈՒԹՅԱՆ ՄԵԹՈԴՆԵՐԻ ԸՆԴՀԱՆՈՒՐ ԲՆՈՒԹԱԳԻՐԸ ԵՎ ԴՐԱՆՑ ԿԻՐԱՌՈՒՄԸ
ՏԱՐԲԱԿԱՆ ԴԱՍԱՐԱՆՆԵՐՈՒՄ**

1.1. Դաստիարակության գործընթացի էություն, խնդիրները, սկզբունքները տարրական դպրոցում:

Դաստիարակությունը որոշակի տեխնոլոգիաների համակարգ է, որն ուղղված է անձի նպատակաուղղված ձևավորմանը: Դաստիարակությունը իրականացվում է ընտանիքի և դպրոցի, հասարակության համատեղ գործունեության ընթացքում:

Հայտնի է, որ դաստիարակությունը երևան է եկել մարդկային հասարակության ծագման պահից և գոյություն կունենա, քանի դեռ գոյություն ունի ինքը՝ հասարակությունը [2, էջ 121]:

Դաստիարակությունը պայմանավորված է հասարակության պահանջունքերով և անմիջականորեն կապված է աշխատանքի հետ: Դաստիարակության տեսությունն ուսմունք է դաստիարակության երևույթների, փաստերի, դրանց արտաքին ու ներքին կապերի, դաստիարակության սկզբունքների ու կազմակերպման ձևերի մասին:

Ժամանակակից մանկավարժ Ս. Մանուկյանը գտնում է, որ **մարդկային ցանկացած գործունեություն դաստիարակության գործընթաց է** և ընդգծում է դաստիարակության հետևյալ սահմանումը. «Դաստիարակությունը արտաքին ներգործությունների հետևանքով մարդու մեջ առաջացած որակական հատկանիշների ամբողջությունն է» [4, էջ 40]:

Դաստիարակության՝ որպես մարդու գիտակցական գործունեության էական հատկանիշներից մեկը նպատակալացությունն է: Մանկավարժությունը, ելնելով հասարակական օբյեկտի պահանջից, անձնավորության զարգացման օրինաչափություններից, սոցիալական պայմաններից, ձևավորում է դաստիարակության նպատակի տեսական հիմունքները [5, էջ 176]:

Դաստիարակության ողջ գործընթացը իր կազմակերպված ու չկառավարող, դրական ու բացասական, ինչպես և զարգացնող ու բթացող տեսակներով արդեն միանգամայն հնարավոր է դարձնում իր մասին միասնական կարծիքի հանգելը: Իսկ անկազմակերպ է այն դաստիարակությունը, որը կայանում է երկու տեսակ գործունեության շնորհիվ: Մեկը կազմակերպված է, սակայն ոչ դաստիարակելու նպատակով: Մյուսը՝ գործունեությունը, ոչ մեկի կողմից չի կազմակերպվում: Այսպիսով՝ ակնհայտվում է «դաստիարակություն» հասկացության բազմանշանակությունը, որը լուրջ խոչընդոտ է մեր գիտության զարգացման համար [3, էջ 36]:

Տարրական դպրոցում իրականացվող կրթադաստիարակչական գործընթացի բողանդակության մեջ կարևորվում են նաև տվյալ ազգի, ժողովրդի ավանդույթների, սովորույթների, դաստիարակությունն ու կրոնաբարոյական արժեքների ձևավորումը: Դաստիարակության բովանդակության մեջ, բնականաբար, ընդգրկվում է նաև գիտելիքների, կարողությունների ու հմտությունների, արժեքների ու վերաբերմունքի համակարգը, ինչպես նաև անձի վարքագիծը:

Կրտսեր դպրոցականի դաստիարակության խնդիրներն են՝

- տարրական դպրոցում իրականացվող դաստիարակության գործընթացն ուղղել կրտսեր դպրոցականի անձի ամբողջական ձևավորմանը՝ հաշվի առնելով նրա համակողմանի և ներդաշնակ զարգացման նպատակը,
- կրտսեր դպրոցականներին հաղորդակից դարձնել հասարակական, հոգևոր-բարոյական, ազգային և համամարդկային արժեքներին, գիտությանը, արվեստին, մշակույթին,
- ձևավորել կրտսեր դպրոցականների արժեքային կողմնորոշումները,
- կազմակերպել աշակերտների իմացական գործունեությունը՝ ապահովելով նրանց հասարակական գիտակցության զարգացումը,
- զարգացնել ինքնահարգանքի, սեփական բարձրարժեքության գիտակցումը, դաստիարակել բարյացակամ վերաբերմունք շրջապատի մարդկանց /թե մեծերի, թե տարեցների/ նկատմամբ,

մշակել մարդկանց հետ վստահելի հարաբերություններ ստեղծելու, երկխոսություն ու հաղորդակցում վարելու կարողություններ,

- սիրո և հարգանքի միջոցով բավարարել երեխայի պահանջմունքները, ձևավորել հասարակության մեջ իր դերի և սոցիալական կարգավիճակի գիտակցում, երեխայի շուրջ ստեղծել բարենպաստ պայմաններ և այլն:

Դաստիարակության սկզբունքների էությունը տարրական դպրոցում

Դաստիարակության սկզբունքներն ընդհանուր դրույթներ են, որոնցում արտահայտված են դաստիարակության գործընթացի բովանդակության, մեթոդների կազմակերպմանը ներկայացվող հիմնական պահանջները (պարտադիրությունը, համալիր բնույթը, նույնանշանակությունը կամ համարժեքությունը):

Դաստիարակության ժամանակակից համակարգը ղեկավարվում է հետևյալ սկզբունքներով.

- երեխայի բարձրարժեքություն,
- դաստիարակության անձնային-հասարակական ուղղվածություն,
- անձի դրական որակների վրա հենվելը,
- դաստիարակության մարդասիրական բնույթը,
- անձնակենտրոն մոտեցումը,
- դաստիարակչական ներգործությունների ձևերի միամասնությունը,
- երեխան իր դաստիարակության գործընթացի սուբյեկտն է:

1.2 Անձի գիտակցության ձևավորման մեթոդները տարրական դասարաններում

Դաստիարակության մեթոդները դաստիարակողի և դաստիարակվողի համագործակցության հիմնական եղանակներն են: Փոխկապակցված այդ գործունեության մեջ կիրառվող մեթոդներով իրականացվում է մարդկանց դաստիարակությունը: Իրականացնողը դաստիարակն է, սակայն դաստիարակվողները պասիվ չեն:

Առանձնացնում են դաստիարակության մեթոդների հետևյալ խմբերը՝

1. անձի գիտակցության ձևավորման մեթոդներ,
2. վարքի և գործունեության կազմակերպման մեթոդներ,
3. խթանման մեթոդներ:

Դաստիարակության մեթոդ պետք է կոչվեն մանկավարժական գործունեության այն բոլոր եղանակները, հնարները, որոնք ընդունակ են առաջացնելու դաստիարակողի կողմից դաստիարակվողների համար նախատեսված գործունեությունը, արարքներն ու գործողությունները: Ընդ որում՝ չկան լավ կամ վատ, դժվար, արդյունավետ և անարդյունավետ մեթոդներ: Մանկավարժական գործընթացի արդյունավետությունը պայմանավորված է դաստիարակության տվյալ մեթոդի ճիշտ և տեղին կիրառմամբ:

Մանկավարժական գործընթացում դաստիարակության հարցում կարևոր է՝ տարրական դպրոցի ուսուցչի մանկավարժական վարպետությունն ու փորձը: Նա պետք է ունենա բժախնդիր դիտողականություն, ուսումնասիրող, գննող ոգի, որպեսզի կարողանա երեխային ուսումնասիրել, բացահայտել, ճանաչել և ըստ այդմ էլ ընտրել ու կառուցել մանկավարժական գործընթացը: Կրտսեր դպրոցի դաստիարակչական գործունեության գլխավոր խնդիրներից է աշակերտի և նրանց շրջապատող մարդկանց, ինչպես նաև հոգևոր արժեքների միջև շփման մշակույթի ձևավորումը: Վերոհիշյալ խնդիրների լուծման միջոցներն են ծնողական ժողովները, հանդիպումները, իրադրային և շարժական խաղերը, թատերականացված բեմականացումները, զրույցները, քննարկումները, մրցույթները, օլիմպիադաները, աշխատանքների ցուցահանդեսները, էքսկուրսիաները և այլն: Պետք

է նկատի ունենալ նաև այն, որ տարրական դասարաններում են ձևավորվում սովորողների այնպիսի որակներ, ինչպիսիք են համագործակցելը, աշխատասիրությունը, ինքնուրույնությունը, հաղորդակցումը, հետաքրքրասիրությունը, կազմակերպվածությունը, ազնվությունը և այլն: Ակնկալվում է, որ նշված միջոցառումները կնպաստեն ոչ միայն նրանց հաղորդակցման մշակույթի ձևավորմանը, այլև ինքնաճանաչման, ինքնաարտահայտման և ինքնագնահատման հմտություններ, ինքնուրույնության մշակմանը:

Ներկայացնենք դաստիարակության գործընթացին առնչվող մի շարք ուշագրավ դատողություններ, որոնք առաջադրել է հումանիստական մանկավարժության ներկայացուցիչներից մեկը՝ Շ. Ա. Ամոնաշվիլին իր «Բարև՝ երեխաներ» գրքում, և որոնք պետք է հաշվի առնել կրթադաստիարակչական գործընթացում [1, էջ 50-52]:

- Հումանիստական հասարակության մեջ դաստիարակությունը կարող է միայն հումանիստական լինել: Այդպիսի դաստիարակության գլխավոր սկզբունքը երեխային դաստիարակչական գործընթացի նկատմամբ դրականորեն տրամադրելն է, նրան իր իսկ դաստիարակության գործում օգնական դարձնելը:
- Հաղորդակցումը մարդկանց կյանքի էությունն է: Հումանիստական դաստիարակության գլխավոր մոտեցումը երեխայի՝ մեծի հետ շփման գործընթացում ուրախություն պարզելն է, համատեղ աշխատանքի, խաղի, հանգստի պահերին հաճույք պատճառելն է:
- Սովորական ամենօրյա կյանքը և մեծահասակների փոխհարաբերությունների բնույթը մի միջավայր է, որում ձևավորվում է ապագա մարդու անձը: Այդ պատճառով շատ կարևոր է, որ մեր ամենօրյա կյանքը, միմյանց հետ շփումը որքան կարելի է շատ համապատասխանեն այն իդեալին, երը ձգտում ենք ներշնչել երեխային:
- Մարդու հավատը մարդկանց, սեփական կենսական դիրքորոշումների նկատմամբ՝ մարդկանց միջև լիարյուն շփման և անհատի վեհացման նախահիմքն է: Դրա համար մենք պետք է երեխայի մեջ զարգացնենք և պահպանենք մեր, իր դաստիարակների, ընկերների, մարդկանց, ինքն իր նկատմամբ ունեցած հավատը:
- Երեխան արձագանքող էակ է: Նրա համար դժվար կլինի մեզ հասկանալը: Այդ մենք՝ դաստիարակներս ենք պարտավոր երեխային հասկանալ և մեր դաստիարակչական պլանները կառուցելիս հաշվի առնել նրա հոգու մղումները:
- Դաստիարակությունն աննկատ և երկարատև գործընթաց է, և դրա համար պետք է խորաթափանցություն, հետևողականություն և համբերատարություն հանդես բերենք դաստիարակչական խնդիրների լուծման բոլոր կոնկրետ դեպքերում:
- Մենք՝ դասվարներս, պետք է ղեկավարվենք նրբազգացությամբ, զթասրտությամբ, բարեհոգությամբ, սիրով, քնքշանքով, անմիջականությամբ, օգնության հասնելու մշտական պատրաստակամությամբ, ապրումակցության զգացումով: Այս բոլորը պետք է զուգակցվի երեխայի նկատմամբ պահանջկոտության, պատասխանատվության զգացումով, հայրենիքի, ապագայի հանդեպ հոգատարությամբ:
- Մենք պետք է վճռականորեն հրաժարվենք հումանիստական դաստիարակությանը հակասող և երեխայի անձը ճնշող հեղինակային այնպիսի ձևերից, ինչպիսիք են գոռալը, ինքնասիրության ոտնահարումը, ծաղրը, կոպտությունը, սպառնալիքը, հարկադրանքը:

Գործնականում այս «պատգամների» իրականացման պատրաստի մեթոդիկա չկա: Այդ պատճառով անհաժեշտ է մշտապես ստեղծագործորեն և մարդասիրական հիմունքներով երեխաների դաստիարակության ուղիներ որոնել: Հենց դրանում էլ պետք է արտահայտվի յուրաքանչյուր երեխայի նկատմամբ դաստիարակողի անսահման հոգատարությունը:

Դաստիարակությունը մարդու մեջ հասարակական վարքի մշակույթը ներդնելու համար առաջին հերթին պետք է ուղղված լինի նրա գիտակցության, աշխարհայացքի, իդեալների, համոզմունքների ու արժեքային կողմնորոշման ձևավորմանը: Այս խնդիրներն առավել արդյունավետ կարող է իրականացվել **համոզման մեթոդներով**:

Համոզման մեթոդների խումբն ընդգրկում է հետևյալն առանձին մեթոդները.

- 1) դաստիարակչական թեմաներով պատմությունների մեթոդ,
- 2) դաստիարակչական թեմաներով գրույցների մեթոդ,
- 3) դաստիարակչական թեմաներով դասախոսությունների մեթոդ,
- 4) դաստիարակչական թեմաներով բանավեճների մեթոդ,
- 5) օրինակի մեթոդ:

1. Դաստիարակչական թեմաներով պատմությունների մեթոդ

Դաստիարակչական թեմաներով պատմության հիմնական ֆունկցիան մարդկանց վարքագծի դրվագները, այսպես կոչված, չեզոք դիրքից, կենդանի և պատկերավոր նկարագրության միջոցով սանին ներկայացնելն ու անուղղակիորեն նրան որաշակի եզրակացությունների մղելն է:

Ժողովրդական առածն ասում է. «Կո՛ւժ, քեզ եմ ասում, կո՛ւլա, դո՛ւ հասկացիր»: Այս առածը հիանալիորեն բացահայտում է պատմելու մոթոդի առանձնահատուկ գործառույթը՝ համոզել առանց ուղղակի հարկադրման: Սանի գիտակցությանը ուղղություն տալն է պատմելու մեթոդի գործառույթը:

Եթե անհրաժեշտ է, մանկավարժը պետք է սպասի հարմար պահի կամ որևէ միջոցով կամ հարցով հրահրի երեխայի հետաքրքրությունը «Ես ձեզ մի բան կպատմեի, բայց դուք ժամանակ չունեք»: Կամ կսկսի պատմել և կիսատ թողնի պատմությունը: Սանին դեպի անհրաժեշտ պատմությունը լսելու հակելու հնրաները բազմազան են:

Այսպիսով՝ իրադրության առկայությանը պետք է սպասել, սակայն կարելի է ցանկալի իրադրությունը խելացիորեն ստեղծել և վարպետորեն կառավարել: Դա մանկավարժի վարպետության խնդիր է: Պատմելու համար լավագույն նյութերը կարելի է վերցնել գեղարվեստական գրականությունից:

Հեքիաթներ պատմելը նույնպես ունի դաստիարակչական կարևոր գործառույթ և պատմելու մեթոդի տարատեսակ է:

2. Դաստիարակչական թեմաներով գրույցների մեթոդ

Զրույցի մեթոդի հիմնական դաստիարակչական ֆունկցիան աշակերտի կենսափորձի բացահայտելը, ակտիվացնելը և սանի փորձի ու գիտելիքների հիման վրա տրամաբանական հարց ու պատասխանի շղթայի միջոցով ունեցած փորձի և գիտելիքների հարստացման և նրան անհրաժեշտ եզրակացության մղելն է:

Դաստիարակչական տեսակետից առավել արդյունավետ է էվրիստիկ կամ սոկրատյան գրույցը:

Դաստիարակչության մեծ արժեք է ներկայացնում նաև ազատ գրույցը, երբ գրույցը կարող է դուրս գալ նախանշված թեմայի սահմաններից, և դաստիարակը ընդառաջ կգնա սանի հետաքրքրություններին՝ կփորձի պատասխան տալ նաև այդ պահին ծագած հուզող հարցերին:

Առավել հաճախ կիրառվում են թեմատիկ և իրադրային գրույցները:

Թեմատիկ գրույցներ առաջարկվում է պլանավորել ուսումնական տարվա ընթացքում՝ նկատի ունենալով դաստիարակչության բովանդակության կարևոր և հանգուցային հարցերի պարզաբանումը

Իրադրային գրույցները օգտագործվում են, երբ առաջացել է անհրաժեշտություն, որպես արձագանք տվյալ պահին առաջացած իրադրության և դրա հետ կապված վարքագծի նորմերի պարզաբանման համար:

Ձույցը երեխային ճանաչելու լավագույն մեթոդ է: սակայն, որպեսզի երեխան լիովին «բացվի» և վստահի իր հոգու գաղտնիքները դաստիարակին և ծնողին, պետք է դրսևորել մեծագույն տակտ, պատասխանատվություն և կուլտուրա երեխայի գաղտնիքները պահպանելու հարցում: Նրանից ստացած ինֆորմացիան չի կարելի առիթ դարձնել իրեն ամբաստանելու կամ ճնշելու համար: Նման մեկ-երկու դեպքը բավական է, որ խզվի երեխայի և մանկավարժի կամ ծնողի հոգևոր և բարոյական կապը: Նման դեպքում երեխան այլևս ոչինչ չի հայտնի նրանց, կվերածվի նրանց համար անիմանալի օբյեկտի:

Դաստիարակության թեմաներով գրույցները պետք է կախված լինեն միմյանց հետ: Դաստիարակը պետք է վերլուծի յուրաքանչյուր գրույցի ընթացքը, արդյունքները, պարզի, ինչ կարևոր եզրակացություններ ձեռք բերեցին, հետագայում ինչի վրա կարելի է հենվել և ինչն ուղղել:

3. Դաստիարակչական թեմաներով դասախոսությունների մեթոդ

Դաստիարակչական թեմայով դասախոսությունների հիմնական ֆունկցիան տեսականորեն հիմնավորված, ընդհանրացված աշխահայացքային գիտելիքների, համոզմունքների և իդեալների ձևավորումն է:

Դաստիարակչական խնդիրները պետք է բխեն վեհ գաղափարից, պատանեկությանն ու երիտասարդությանը մղեն բարոյական բարձր արժեքների, մեծագործությունների, հայրենասիրության, մարդասիրության, ազնիվ ու վեհ քաղաքացիական վարքագծի [6, էջ 168]:

Դաստիարակչական թեմաներով դասախոսությունների կարևոր թեմաներ են առողջապահությունը և սեռական կյանքի ոլորտը՝ որպես սեռական լուսավորության կարևոր միջոց: Այսպիսի թեմաներով դասախոսություն կադալու պետք է հրավիրել առողջապահության, էթիկայի, էսթետիկայի ոլորտի մասնագետներին: Այսպիսի դեպքերում ուսումնական հաստատության ներկայացուցչի՝ դաստիարակի խնդիրն է լինել ակտիվ ունկնդիր և հետագայում օգնել իր սաների անհրաժեշտ գիտելիքները ամրապնդելուն:

4. Բանավեճի մեթոդ

Բանավեճը դաստիարակության առավել բարդ մեթոդ է: Բանավեճի գլխավոր խնդիրը սանի դիրքորոշման ակտիվացումն է, նրան իր հայացքները և համոզմունքները պաշտպանելու անհրաժեշտության առաջ կանգնեցնելը: Բանավեճի մեթոդի հիմնական ֆունկցիան սեփական տեսակետը պաշտպանելու կարողության ձևավորումն է: Բանավեճի խնդիրն է սովորեցնել խոսել գաղափարի շուրջ, հակադրվել գաղափարին և ոչ թե իրենց ընդդիմախոսի սանին:

Պետք է սովորեցնել բանավեճի հանգիստ՝ խոր հարգանք դրսևորելով ըդդիմախոսի անձի և գաղափարի հանդեպ:

Սակայն անհրաժեշտ է սովորեցնել տիրապետել բանավեճի ամբողջ զինանոցին, այդ թվում՝ սովետությունը և կեղծ ապացուցման ձևերին [6, էջ 170]:

Առաջին քայլը պետք է լինի հրատապ թեմայի ընտրությունը, այնպես, որ դասարանը ձգտի ակտիվորեն մասնակցել:

Բանավեճի կազմակերպմանը պետք է հաղորդել հանդիասավորություն, պատշաճություն և կարևորություն, սահմանել ելույթների, մասնակիցների վարքի կանոններ: Խորհուրդ տալ ավելի տոնական տեսքով ներկայանալ բանավեճին, սակայն խուսափել ուշադրություն շեղող էֆեկտներից:

Հանգիստ կարելի է ամեն ինչ իմաստավորել, հաշվի առնել հետագա դաստիարակչական աշխատանքի, նույնիսկ նույն թեմայով ավելի ուշ նոր բանավեճ կամ բանավեճեր կազմակերպելու հնարավորությունը:

Բանավեճի հետագա իմաստավորումը նույնպես մանկավարժական խնդիր է և դաստիարակի պարտականությունն է:

5. Օրինակի մեթոդ

Օրինակը զննականությունն է դաստիարակության գործընթացում:

Թեև օրինակը սերտորեն կապված է պատմելու և նկարագրելու հետ, սակայն այդ միջոցները տվյալ դեպքում հանդես են գալիս որպես հնարներ: Օրինակին բնորոշ են բերլուծության, խմբավորման, դասակարգման հնարները: Օրինակը կիրառելիս վարքի նմուշից պետք է հեռացնել երկրորդական, պատահական գծերը, առավել ցայտուն արձնել ընդօրինակման ներկայացվող հատկություններն ու վարքի դրսևորումները:

Օրինակի արդյունավետության պայմաններն են.

- 1) Օրինակը պետք է գրավիչ լինի և արժևորվի սանի կողմից: Օրինակի օբյեկտը պետք է օժտված լինի հեղինակությամբ, բարոյական լուսապսակով:
- 2) Օրինակին հետևելը պետք է համապատասխանի սանի հրատապ պահանջմունքներին, նրա հեռանկարային նպատակին և նարոյական մոտիվներին, աշխարհայացքին և սկզբունքներին:
- 3) Օրինակում ընդօրինակման ենթակա նմուշը պետք է լինի հստակ ներկայացված, երկրորդական և պատահական հատկանիշներից զատված, իսկ անհրաժեշտության դեպքում քննադատական վերլուծությամբ՝ օբյեկտիվ գնահատումով:
- 4) Օրինակը՝ որպես վարքի նմուշ, պետք է արժևորվի մերձավորների և հասակակիցների միջավայրում:

Պետք է նկատի ունենալ, որ վատ օրինակը նույնպես ունի հզոր դաստիարակչական ներգործություն: Եթե լավ օրինակով սովորեցնում ենք՝ ինչպես պետք է լինի, ապա վատ օրինակի վրա պետք է ցույց տալ՝ ինչպես չպետք է լինի: Ուրիշի սխալների վրա սովորում են իմաստունները: Կարիք կա՞ արդյոք թմրամոլ դառնալ, որպեսզի սեփական փորձով հասկանանք դրա կործանարար ազդեցությունը: Բավական չէ՞ տեսնել և հասկանալ արդեն սխալված մարդու տառապանքն ու դժբախտությունը: **Վատ օրինակը ցույց տալով և լուսապսակից զրկելով այն՝ կատարում ենք նաև կանխարգելիչ խնդիր** [6, էջ 162-175]:

1.3 Անձի գործունեության կազմակերպման և հասարակական վարքի փորձի ձևավորման մեթոդները տարրական դասարաններում

Անձի գործունեության կազմակերպման մեթոդների հիմնական դաստիարակչական ֆունկցիան սանի վարքագծի, կարողությունների, հմտությունների և սովորությունների ձևավորումն է:

Անձնավորության վարքագծի կարևոր հատկանիշը միասնությունն է՝ իր փոփոխման ընթացքի մեջ: Հետևաբար, պետք է ապահովվեն վարքի տարրերի սերտ միասնությունը և ամբողջականությունը, որոնց ձևավորումն անմիջականորեն բազայավորվում է նրա գիտակցության վրա՝ ապահովելով անձնավորության վարքի կանխատեսելի ընթացքը վարքի հասարակայնորեն արժևորված ձևաչափը:

Անձի գործունեության կազմակերպման մեթոդների խմբում ընդգրկված են **վարժությունների և ընտելացման, պահանջի և հրահանգավորման, դաստիարակչական իրադրությունների ստեղծման կամ բնական հետևանքների, խաղի, մրցության մեթոդները:**

- 1) **Դաստիարակչական վարժությունները հմտությունների և կարողությունների** ձևավորման ամենակարևոր միջոցներն են և կրում են դիդակտիկական վարժությունների հիմնական հատկանիշները. կրկնություն, վերահսկողություն, ամրապնդում:

Վարժությունները հարկավոր են նույնիսկ երեխային անհրաժեշտ ամենահասարակ թվացող հմտությունների ձևավորման համար՝ հագնվել, լվացվել, ատամները մաքրել, շորերը, գրքերը դասավորել պահարանում և այլն: Այս տիպի վարժությունների ծավալը մեծ է հատկապես ավագ նախադպրոցական և կրտսեր դպրոցական տարիքում: Ըստ հատուկ կատարված հետազոտությունների՝ կան այնպիսի հմտություններ, որոնց ձևավորումը պահանջում է մեծ թվով կրկնություններ, օրինակ՝ պարզված է, որ այնպիսի պարզ հմտության ձևավորումը, ինչպիսին կոշիկի թելերը հանգուցելն է, փոքրիկից պահանջում է կրկնություն ավելի քան երկու հարյուր անգամ [9, էջ 118]:

Վարժության կարևոր տարրը ընտելացումն է: Մարդը հարմարվելու մեծ հնարավորություն ունի: Նա հարմարվում է ինչպես լավին, այնպես էլ վատին: Մարդը հարմարվում է ամեն ինչին, և երբ հարմարվում է վատին, նաև վերափոխելը շատ դժվար է: Եթե ուզում ենք, որ մարդը լինի գեղեցիկ ու կատարյալ, նրա շրջապատում ևս ամեն ինչ պետք է լինի այդպիսին:

Մանկության տարիներից երեխաներին պետք է ընտելացնել կատարյալին, բարուն, ազնիվին և վեհին, այլապես հետո շատ ուշ կլինի: Ամեռը, հատկապես դպրոցում, մանկապարտեզում, ընտանիքում, շրջապատում, պետք է լինի մաքուր, գեղեցիկ, հարմարավոտ: Հաճախ մատչելի և պարզ գեղեցկությունը հսկայական դաստիարակչական դեր է կատարում:

- 2) **Պահանջի և հրահանգավորման մեթոդ:** Մանկավարժության տեսության մեջ տարբերակվում են պահանջի հետևյալ տեսակները.

- անուղղակի պահանջ
- պահանջ-խոհուրդ, որը հենված է դաստիարակի հեղինակության հարկադրանքի վրա: Պահանջ-խորհրդի իմաստը հենց նա է, որ երեխան, չկատարելով դաստիարակի պահանջ-խորհուրդը, «քաղի» դրա դառը պտուղները, ափսոսա և մյուս անգամ ավելի ուշադիր գնահատի խորհրդի արժեքը:
- պահանջը՝ խաղային ձևավորմամբ, օգտակար է հատկապես նախադպրոցական և կրտսեր դպրոցական տարիքում:
- պահանջ-հրահանգավորման դեպքում բացատրվում է պահանջի կատարման ողջ ընթացքը:

- 3) **Դաստիարակող իրադրությունը** կյանքի բնական իրադրությանն այնպիսի ուղղություն տալն է, որի ընթացքում հանգամանքները պարտադրում են սանին կատարել այն, ինչ անհրաժեշտ է, և որի արդյունքում ձևավորվում են անհրաժեշտ հմտություններ:

Դաստիարակչական իրադրության կարևոր հատկանիշներն են.

- իրադրության բնական՝ կենսական լինելը,
- սանի դրական հակումների հաշվառումը, նրան լավ ճանաչելը,
- սանի կարողություններն ու ընդունակությունները նպատակային օգտագործելը,
- նրան սիրած գործ հանձնարարելը և դրա միջոցով բացասական հատկանիշների հաղթահարումը,
- անցանկալին ցանկալիով միջնորդավորելը,
- ձևավորվող իրադրության դաստիարակչական ֆունկցիաների պլանավորումը:

Դաստիարակող իրադրությունների մեթոդի գաղափարը առաջ է քաշել Ժ. Ժ. Ռուսոն՝ անվանելով այն բնական հետևանքների մեթոդ: Դաստիարակչական իրադրությունների մեթոդը հիմնալի է ներկայացված հայ նոր մանկավարժության հիմնադիր Խաչատուր Աբովյանի «Պատմություն Տիգրանի կամ բարոյական խրատներ հայ մանուկներին» գրքում:

- 4) **Խաղի մեթոդ:** Խաղը մարդու գործունեության կարևոր ձև է: Այն ունի զարգացնող, դաստիարակող և հոգեթերապևտիկ նշանակություն, որով և պայմանավորված է խաղի մեթոդի բացառիկ դաստիարակչական արժեքը:

Խաղի՝ որպես դաստիարակության մեթոդի հիմնական ֆունկցիան իրականում անմատչելի հարաբերություններ սանին մատչելի դարձնելը և ծավալվող խաղային գործունեությամբ անհրաժեշտ որակների ձևավորումն է: Խաղն ունի նաև գործունեությունը մոտիվացնելու և խթանելու հնարավորություններ:

Դաստիարակչական գործունեության ընթացքում կիրառվում են խաղի մեթոդի հետևյալ տարատեսակները

ա) **Գործնական խաղեր:** Գործնական խաղերը կարելի է կիրառել քաղաքավարության դաստիարակման և օտար լեզուներ սովորեցնելիս՝ միաժամանակ դրանց հաղորդելով դաստիարակչական արժեք:

բ) **Դերային խաղեր:** Կարևորն այն է, որ դերը ապահովի յուրաքանչյուր աշակերտի անհրաժեշտ որակների ձևավորումը:

Օրինակ՝ դասվարն ուզում է «Շովային անձնակազմ» խաղն օգտագործել կարգպահություն, զսպվածություն, քաղաքավարություն դաստիարակելու համար: Շովայինների դերով հրապուրված աշակերտները արագ ու հստակ կերպով կատարում են բոլոր հրամաններն ու «նավի» վրա սահմանված կենսակարգը և հեշտությամբ են յուրացնում այն վարքի նորմերը, որոնք առաջ սիրով չեն կատարում:

- 5) **Մրցության մեթոդի** հիմնական դաստիարակչական ֆունկցիան անձնավորության կամային որակների ձևավորումն ու ամրապնդումն է: Մրցություններն անկասկած ունեն անձնավորության գործունեությունը խթանող ու գնահատող ֆունկցիա, սակայն, որպես դաստիարակչական ներգործություն, այն իրականացվում է սանի գործունեության կազմակերպմամբ, որը բնորոշում է մրցությունը՝ որպես անձնավորության գործունեությունը կազմակերպող մեթոդ:

Մրցության կազմակերպման ժամանակ երեխաների բոլոր ապրումները որոշվում են միայն առաջնության համար պայքարելու և պարգևատրվելու ձգտումով: Այդ դեպքում տվյալ գործոնի դաստիարակչական ներգործությունը խիստ թուլանում է: Նման դեպքում գործունեության հիմնական դրդապատճառը ուժեղացնելու փոխարեն այն շփոթեցվում, փոխարինվում է այլ բանով: Դա կարող է դառնալ բացասական գծերի փառասիրության, դատարկ փառամոլության, ուզածդ գնով ընկերներից առաջ անցնելու ձգտում ձևավորելու պատճառ:

Այսպիսով, գործունեության կազմակերպման մեթոդների արդյունավետության հիմնական պայմանը կիրառման համակարգվածությունն ու պարբերականությունն է, նույնական կրկնությունը՝ որոշակի հաճախականությամբ, որը էլնում է պարզ կանոնների և տեխնիկական բնույթի պահանջներից:

1.4 Վարքի և գործունեության խթանման մեթոդները տարրական դասարաններում

Մեթոդների այս խումբն ընդգրկում է խրախուսանքն ու պատիժը:

1. **Խրախուսանքը** սանի վարքգծի և արաքների դրական գնահատման ձև է: Նրա հիմնական գործառնությունը սանի դրական վարքագիծը խթանելը, նրան ինքնավստահություն ներշնչելը և ավելի լավ արարքների մղելն է:

Խրախուսել նշանակում է ընդունել սանի արարքների հասարակական արժեքավորությունը, ամրապնդել սանի հավատը իր ուժերի նկատմամբ և խթանել նրա արժեքավոր գործունեությունը:

Խրախուսանքը կապված է դրական հույզերի և վեհ զգացմունքների հետ: Ստոր, մանր, քաղբենիական պահանջմունքները խթանող խրախուսանքը հումանիստական մանկավարժության տեսակտից անարժեք է:

Խրախուսանքը հանդես է գալիս, որպես արարքի դրական գնահատման ձև: Այս իմաստով խրախուսանք է նաև երեխայի վատ, նույնիսկ հանցագործ և անբարոյական արարքները դրական գնահատելը, դրանց հավանականություն տալը:

Պատահում է, երբ դաստիարակը կամ ծնողը, չկարողանալով լուրջ գնահատել երեխայի այս կամ այն արարքի վտանգավոր հետևանքը, անզգուշորեն խրախուսում է երեխայի «մանր» չարաճճիությունը: Նա ուրբել է հավի վիզը՝ ոչինչ: Խեղդում է կատվին և շանը՝ ոչինչ: Խլել է խաղընկերոջ խաղալիքը և հրճվում է նրա տառապանքով, իսկ մայրը մեղմորեն ժպտալով շոյում էր իր «քաջի» գլուխը: Ժողովրդական առածն ասում է. «Տղա ձու գողացավ, մայրը գովեց: Տղան մեծացավ և ձի գողացավ»: «Ձու գողացողը ձի էլ կգողանա»: Խրախուսել կարելի է միայն իսկական դրական, հասարակայնորեն արժեքավոր արարքները:

Խրախուսանքով պետք է առաջին հերթին գնահատվի սանի ներքին ուղղվածությունը դեպի լավն ու բարին, բայց նաև նրա ձեռք բերած իրական արդյունքը: Խրախուսանքը պահանջում է գնալ դեպի բարին՝ մեծացնելով պահանջները սանի նկատմամբ: Այդ պատճառով էլ կարիք չկա անընդհատ խրախուսել սանի կողմից իր պարտականությունների սովորական կատարումը: Արդյունքների խրախուսումը թեև ոչ առաջնային, սակայն կարևոր խնդիր է, որպեսզի երեխան ոչ միայն լավ գործ կատարելու ցանկությամբ և ջանքերով աչքի ընկնի, այլև ձգտի լավագույն արդյունքների: Յուրաքանչյուր տարիքում այն պետք է փոխի իր ձևն ու բովանդակությունը:

Ուրիշների գովեստները, պարզն ու խրախուսանքը հասուն մարդը կարող է մերժել և նույնիսկ համարել իր արժանապատվության համար վիրավորանք, **եթե խրախուսանքը կամ պարզը իրեն տրվում է սեփական հակադիր մարդկանց կողմից:**

Խրախուսանքը կարող է լինել բարոյական և նյութական: Բարոյական խրախուսանքի ձևերն են հավանություն տալը, շնորհակալություն հայտնելը: Երբեմն հասարակ ժեստը կամ ժպիտը, առանց խոսքերի, կարող է կատարել լուրջ խրախուսանքի դեր:

2. Պատժի մեթոդ: Պատիժը դաստիարակության հնագույն մեթոդներից է:

Հին Սպարտայում ասում էին. «Տղայի ականջը մեջքին իջեցված հարվածով է բացվում» [6, էջ 190]:

Ժ. Ժ. Ռուսոն, ըմբոստանալով մարդու նկատմամբ ամեն մի պատժի և հարկադրանքի դեմ, դրանց հակադրեց բնական հետևանքների մեթոդը:

«Երեխան պետք է անի այն, ինչ ինքն է ցանկանում»: Մանկավարժը թող ստեղծի այնպիսի պայմաններ, որ երեխան իր ցանկությամբ կատարի «այն, ինչ դաստիարակն է ցանկանում, թող հանգամանքները դաստիարակեն սանին» [6, էջ 190]:

Հումանիստական որոշ մանկավարժական ուղղություններ, պատիժը համարելով դաստիարակության կարևոր մեթոդ, այն գնահատում են որպես սանի անընդունելի արարքների բացասական գնահատման ձև: Ամբողջ հարցն այն է, որ սանի վարքագծի և արարքների բացասական գնահատումը կարող է հենվել նրա գիտակցության վրա, առանց նրան նվաստեցնելու կանխարգելել նրա անընդունելի վարքագիծը և բարձրացնել նրա ինքնավստահությունն ու ինքնահարգանքը, խթանել դրական վարքագիծը:

Պատժի իմաստը հումանիստական դիրքերից, հետևյալն է.

1) Պատիժն օգնում է սանին հասկանալ իր կատարած արարքների սխալ և անընդունելի լինելը շրջապատի համար և իր անձնական ճակատագրի տեսանկյունից:

2) Պատիժն ոչ թե սանի, անձնավորության, այլ նրա արարքի բացասական գնահատման ձևն է: Պատժի նպատակն է ասել սանին, որ նրա արարքն է վատ ու անըդունելի, իսկ ինքը հարազատ է միջավայրին, թանկ է դաստիարակի համար, ինքը լավն է, իսկ տվյալ պահին նրա արարքը անհարիր է իր դրական կերպարին, գտնել և նշել սանի դրական կողմերը, որոնց օգնությամբ կարելի է հաղթայիարել բացասական գծերը:

3) Պատիժը պետք է օգնի սանին լավը դառնալ, իր վատ արարքը հաղթահարել և կոլեկտիվի ու շրջապատի հետ համերաշխության դուռ բացի սանի առաջ:

4) Պատիժն անիմաստ է, եթե այն երեխայի համար չի դառնում իր սխալն ուղղելու արդյունավետ ուղեցույց, եթե չի ապահովում իր վատ արարքն ուղղելու, այն լավով փոխարինելու նրա գործունեությունը:

Պատժի արդյունավետ պայմաններն են.

ա) Սանի գիտակցության վրա հենվելը կարևոր է, որ նա հասկանա իր սխալը:

բ) Պատիժը պետք է լինի լիովին արդարացի, չի կարելի պատժել ենթադրելով, կասկածելով:

գ) Պատիժն արդյունավետ է այնպիսի պայմաններում, երբ սանը այն համարում է անհրաժեշտ և իր արարքների բնական հետևանք:

դ) Պատիժը չափազանց սուր գործիք է, քան դաստիարակչական որևէ այլ ներգործություն: Այն պետք է կիրառվի առավել նուրբ տակտով և զգուշորեն՝ **առաջին հերթին նկատի ունենալով մանկավարժական էթիկայի «Մի՛ վնասիր» պահանջը:**

ե) Պատիժը առավել, քան դաստիարակչական որևէ այլ նորգործություն, պահանջում է ոչ միայն անհատական մոտեցում, այլև իրադրության առանձնահատկությունների հաշվառում՝ օբյեկտիվ և ճիշտ գնահատում:

Պատժելու իրավունքը էլնում է ծնողի և դաստիարակի քաղաքացիական պարտքից:

Ոչ բոլորն իրավունք ունեն երեխային, սանին պատժելու: Պատժելու իրավունքը խստրեն սուբօբյեկտիվացված է, ոչ ոք, այդ թվում՝ երեխայի հարազատ ծնողը՝ իրավունք չունի իր երեխային պատժելիս անցնել օրենքի, բարոյականության և մանկավարժական անհրաժեշտության սահմանները: Իսկ կոլեկտիվի պահանջով սանին պատժելը միշտ չէ, որ կարող է ճիշտ և արդարացի լինել: Պատիժը պետք է լուծի անհատի և կոլեկտիվի միջև ծագած կոնֆլիկտը: Եթե պատժի նպատակը անհատին ճնշելը և խմբի շահերին ենթարկելն է, այն հեռանում է բարձրագույն բարոյական արժեքից՝ արդարության սկզբունքից և առաջ է բերում անհատի բողոքը: **Արդարությունը ծնում է իրավունք, անիրավությունը՝ կոնֆլիկտ [6, էջ 193]:**

ԵԶՐԱԿԱՑՈՒԹՅՈՒՆ

Ամփոփելով «Դաստիարակության մեթոդների կիրառումը տարրական դասարաններում» վերնագրով հետազոտական աշխատանքը՝ եկել ենք հետևյալ եզրակացությունների.

- Տարրական դպրոցում իրականացվող դաստիարակության գործընթացը պետք է ուղղել կրտսեր դպրոցականի անձի ամբողջական ձևավորմանը՝ հաշվի առնելով նրա համակողմանի և ներդաշնակ զարգացման նպատակը:
- Կազմակերպված և զարգացնող դաստիարակության գործընթացն իրագործվում է ճիշտ ընտրված և նպատակային կիրառվող մեթոդների միջոցով:
- Դաստիարակության մեթոդները դասակարգվում են անձի գիտակցության ձևավորման, հասարակական վարքի, փորձի ձևավորման և վարքի, գործունեության խթանման մեթոդների խմբերի:
- Տարրական դասարաններում դաստիարակության մեթոդների կիրառումը նպատակային ու արդյունավետ է դպրոցի և ընտանիքի համագործակցության պայմաններում:

ՕԳՏԱԳՈՐԾԱԾ ԳՐԱԿԱՆՈՒԹՅԱՆ ՑԱՆԿ

1. Ամոնաշվիլի Շ. Ա., Բարև՝ երեխաներ, Ձեռնարկ ուսուցչի համար, 1990թ.:
2. Ասատրյան Զ. Ա., «Տարրական հրթրության մանկավարժություն», Երևան, 2017թ.:
3. Մանուկյան Ս. Պ., «Մանկավարժագիտություն», Երևան», 2002թ.:
4. Մանուկյան Ս. Պ., «Ընդհանուր Մանկավարժագիտություն» (Նոր դասընթաց), «Զանգակ-97» հր., Երևան, 2005թ.:
5. Ղույունյան Գ. Ե., «Մանկավարժություն» Գիրք 1, Երևան, 2005թ.:
6. Ղույունյան Գ. Ե., «Մանկավարժություն», Գիրք 2, Երևան, 2005թ.:
7. Պետրոսյան Հ.Հ., «Մանկավարժական ժամանակակից տեխնոլոգիաներ», Երևան, 2012թ.:
8. Սահակյան Կ. Գ., Մանկավարժություն առարկայի ուսումնասիրման մեթոդական ցուցումներ և առաջադրանքներ, Երևան, 2008թ.:
9. Подласый И. П., Педагогика часть 2, М.Б “ВЛАДОС”, 2002г.